

D. D.

5

DISSERTATIO ACADEMICA

DE

LAVANDULA,

QUAM,

CONSENS. EXPER. FAC. MED. UPS.

PRÆSIDE

VIRO NOBILISSIMO

CAROLO A LINNÉ,

MED. ET BOT. PROF. REG. ET ORD.

PUBLICO EXAMINI SUBJICIT

STIPEND. WREDIANUS

JOHANNES DANIEL LUNDMARK,

NERICIUS.

IN AUDIT. GUSTAV. MAJ. D. 20 DEC. 1780.



UPSALIÆ,

TYPIS DIRECT. JOHAN. EDMAN, REG. ACAD. TYPOGR.

Ad certissimam Individuorum in Regno vegeta-
 tabili cognitionem conducunt accuratiores plan-
 tarum descriptiones, eamque ob causam ab omnibus
 recentioris ævi Botanices Cultoribus exoptatæ fue-
 runt. De necessitate novas & clariores elaborandi
 descriptiones satis superque persuasi fuerunt Mediæ
 ætatis Botanici, maximis obruti difficultatibus in An-
 tiquissimorum Auctorum brevibus & obscuris expli-
 candis adumbrationibus. Hoc tam arduum, quam lau-
 dabile opus adgressi sunt plures, quos inter præcipue
 eminent **RAJUS**, **MORISON** & **BAUHINUS**, qui in ma-
 ximum scientiæ emolumentum integra conscripserunt
 volumina de iis, quas perspectas sibi habebant, plan-
 tis; quorum autem postea exemplum rarius, quam
 par est, fuit imitatum. Quid? quod occupata po-
 tius videtur industria Botanicorum in condendis sy-
 stematibus, characteribus & differentiis, una cum in-
 satiable novum inveniendi cupidine. Ingens etiam
 plantarum, quæ indies detegebantur, copia effecit,
 ut contenti essent Botanici descriptionibus breviori-
 bus,

A

bus, quarum autem sæpius apparuit vitium, ut nova fuit reperta species.

Descriptiones exactissimæ & longiores eis etiam tædium movent, qui totos sese botanico devoverunt studio; in casu vero necessitatis eo redacti sumus, ut verbosior etiam placeat auctor, qui naturalem plantæ structuram cum in finem accuratissime adumbraverit, ut inde, quid maxime essentiale sit, colligere queamus. Eam ob causam haud contemnendæ sunt Monographiæ Generum, quibus omnes unius ejusdemque Generis Species inter se comparari possunt & definiri; ea vero tunc observanda Methodus, ut primum fiat descriptio generalis earum proprietatum, quæ naturalem Generis structuram constituunt & deinde probe notandum, qua in re species quæcumque a Generali differat. Tali modo breves satis evadunt descriptiones speciales & quando terminis artis & scientiæ, non vero cujusvis regionis propria utimur lingua, inde accidit, ut paucis plus erudiat verbis Descriptor peritus, quam pagellis integris Scientiæ ignarus.

In votis esset, ut plures ejusmodi haberemus descriptiones Generum, in primis majorum, quæ, quando magis naturalia fuerunt, ob differentiam sæpe minimam Specierum, difficillime enodantur. Incommodum hoc, ævo recentiori, haud parum auxit nimia Specierum multiplicatio, inde exorta, quod varietates & species non separaverint Botanici & plantæ plures, (quæ Varietates esse debuerant) sejunctæ sint ob differentiam exiguam, hirsutiem nempe, con-

tor-

torfionem, ramificationem majorem, & quæ sunt cetera a cultura, climate & solo pendentia signa. Hujus indolis sunt errores, quos vigilantior Botanicus evitare conatur, sed qui facilius sese insinuant, quando non omnes species, nedum Genus ipsum sufficenter cognoscit Scriptor. Prorsus vero impossibile est, ut effugi possit confusio, si, quando nova describatur planta, omiffæ fuerint notæ, quibus ab antea cognitis discerni possit. Hoc mihi æque absõnum videtur, ac si quis rem quamdam demonstrare vellet, non vero indicaret, quænam a præmissis sequi deberet conclusio.

Hæc perpendens, GENUS LAVANDULÆ pro virili illustrare constitui, quod ob ipsam paucitatem specierum, mihi præ aliis placuit, quatenus & tenuis mea Minerva & res angusta domi longiorem disquisitionem, majoremque detrectent sumtum. Tum erit, L. B. conatum meorum mitem agere Censorem.

NOMEN.

In explicanda ratione nominis Lavandulæ non omnes consensere Auctores, jam hanc, jam aliam fingentes denominationis originem; quum vero parum profit enumerare omnes, paucis tantum nominare lubet, vero simillimum esse, quod Lavandulæ nomen desumtum sit a *lavando*, quia herba in lavacris & balneis frequentissime fuit usurpata.

ORDO NATURALIS *).

VERTICILLATÆ variis apud Auctores nominibus occurrunt; sunt enim

Verticillata & *Galeata*, MORIS. RAJ.

Labiata & *Personata*, Tourn. PONTED. ADANS.

Ringentes, ROYENI.

Gymnotetrasperma HALLER.

Dimacrostemones, WACHENDORFII.

Petalostemones. *Tetranda*, GLEDITSCH.

Monopetali Irregulares, RIVINI.

Characterem earum Essentialem potissimum constituent: COROLLA irregularis; FILAMENTA 4, quorum duo longiora semper fertilia, STYLUS unicus, plerumque intra *Germine* positus, SEMINA 4 nuda, solo calyce persistente conservata.

In eo etiam plerumque conveniunt *verticillata*, quod fit

CAULIS tetragonus, vulgo erectus, articulatus, brachiatus.

FOLIA plurimis opposita, sæpius indivisa & rarissime dissecta, pilosa, punctata.

FULCRA. *Stipula* & *Cirrhi* nulli. *Spina* rarissima, sed *Pili* glandulosi, sæpius ramosi, plumosi. *Bractea* sæpius verticillum involventes.

INFLORESCENTIA plerumque *verticilli* in axillis foliorum, interdum magis remoti, interdum confluentes in Racemos, rarius spicatos, sæpius spiciformes.

CA-

*) Palmarium artis esse, inquirere in Ordines Naturales, dudum statuit Cæsalpinus.

CALYX: *Perianth.* 1-phyllum, erectum, tubulosum, limbo plerumque 5-fido, persistens.

COROLLA monopetala. *Tubus* calyce vulgo longior, cujus basis tubulosa saccum melleum continet & vices *Nectarii* subit. *Limbus* ampliatus, 5-fidus in plurimis & vere verticillatis ringens; *Labium superius* erectum, bifidum: *Lobis* sæpe connatis in galeam fornicatam, genitalia longiora conservantem. In floribus magis regularibus labium superius obsoletum est. *Labium inferius* 3-fidum, sæpe dilatatum, elongatum, *Lacinia* intermedia in plurimis rotundata.

STAMIN. *Filamenta* 4, supra basin tubi inserta, sub labio superiore adscendentia, in galeatis curva, basi infra insertionem cum stria elevata decurrentia ad receptaculum: horum duo superiora longiora, reliqua duo in nonnullis parum breviora, in aliis brevissima & quasi rudimenta solummodo staminum, nam sterilia. *Antheræ* in Didynamis 4, in Diandris 2 (reliquarum vix rudimenta) plerumque conniventes & fere conjugatæ, apicem *Styli* involventes.

PISTILL. *Germen* minimum, sæpe sulco cruciato exaratum & superum. *Stylus* unicus, filiformis, derectionem Filamentorum sequens, sæpe longior, apice incurvatus. *Stigma* vulgo bifidum: laciniis acutis, altera longiore dorsum corollæ spectante.

PERICARP: *Calyx* permanens; rigidus, in cujus sinu
SEMINA 4 æqualia, conniventia, interdum angulata, truncata.

QUALIT. *amara* cum *Acredine*, spirantes (in primis suffruticosæ apricæ & ringentes)

OLIDUM in epidermide herbæ, in vasis minimis oleo volatili plenis.

SAPIDUM in corticali & fibrosa substantia.

VIREs primariae Orgasticae, tonicae, stimulantés, *binc* pellentes.

Externe: Resolyentes.

GENUS.

Ad verticillatas Ringentes & Irregulares relata est Lavandula, cujus hucusque characterem Essentialem constituit *Corolla Resupinata* *), hoc est, corolla Irregularis, cujus Labium superius inferiore majus fuit, quam notam characteristicam nuper detecta Lavandula *Carnosa* frustraneam & inutilem reddidit; Labium enim illius superius inferioris duplam fere habet magnitudinem; quum vero in ceteris adeo conveniat cum Lavandula, ut habitus ipse oculis periti Botanici indicare possit, quod ad hoc referri debeat Genus, eam inde separare minime licuit; sed ut sub eodem cum Lavandula Genere contineri possit, a Flore resupinato characterem desumendum esse putavimus; partibus enim floris primariis gaudet resupinatis. Eum vero appellare placuit florem resupinatum, qui Corolla constat irregulari & geni-

ta-

*) Figuram Corollæ Resupinatae & priorem Generis Lavandulae Characterem representat Tabella ab initio Dissertationis adposita, Genitalia vero resupinata conspici non possunt, quum intra Tubum Corollæ lateant. Fig. 1. Corolla & Calyx cum Bractea; fig. 2. Corolla cum Calyce, bractea adempta.

talibus ad labium inferius reflexis & insertis; perinde est, siue corolla resupinata fuerit, nec ne.

Hoc modo non tantum ab Hyssopo *Lophantho* & Ajuga *Orientali*, quibus corolla, non vero flos resupinatus, distinguitur; sed etiam ab Ocymo, cujus stamina ad basin processum emittunt.

CHARACTER ESSENTIALIS:

CALYX bilabiatus, FLOS resupinatus, FILAMENTA absque processu.

CHARACTER NATURALIS:

PLANTA suffruticosa; pedalis, vel sesquipedalis.

RADIX ramosa.

CAULIS paniculatus, brachiatus, incanus, solidus.

RAMI erecti; tetragoni, oppositi.

FOLIA opposita, plerumque sessilia, inferiora saepius petiolata. Petioli canaliculati.

SPICA terminalis, pedunculata, solitaria, erecta, pollicaris. Bractea calycibus breviores, oblongae, patentes, cum fructu persistentes. Flores subverticillati, coarctati, bracteis suffulti.

CALYX: *Pertanthium* monophyllum, tubulosum, resupinatum, striatum, ore dentatum: dentibus brevissimis; persistens, scariosum.

COROLLA monopetala, irregularis, ringens. *Tubus* cylindraceus, calyce longior. *Limbus* patens. *Labium Superius* bifidum, *inferius* trifidum, vel integerrimum.

STAM. *Filamenta* 4, deflexa, quorum duo breviora intra tubum corollae. *Antherae* subrotundae.

PISTIL. *Germen* 4-partitum. *Stylus* filiformis, longitu-

gitudine tubi, versus stamina deflexus. *Stigma* bilobum, lobis emarginatis, connivens.

PERICARP: nullum. *Calyx* semina fovens, connivens, usque dum maturescunt, quo facto hiat.

SEMINA. 4. obovata.

PLACENTATIO. Quando germinaverit semen, oritur *Corculum* semine vestitum, cujus jam exuitur Epidermis & duo sese expandunt Cotyledones ovati, basi tranverse dissecti; hinc quasi triangulares angulis obtusis, diu persistentes.

GERMINATIO in terra frigida 15 aut 18 dierum spatio peragitur.

FOLIATIO revoluta, opposita.

ÆSTIVATIO imbricata.

TEMPUS FLORENDI per totam fere ætatem in nostris terris.

METHODUS DORMIENDI. Circa somnum Lavandulæ nihil singulare occurrit, sed (uti vulgo in plantis accidit) appropinquante nocte folia majora latera superiora cauli adjungunt, binaque opposita includunt quasi & complectuntur foliola interiora, quæ, haud aliter ac rudimenta ramorum, in in axillis foliorum fasciculatim sunt posita.

SPECIES.

DIFFERENTIÆ SPECIFICÆ id continent, quod maxime essentiale & selectissimum est descriptionum omnium, eas tantummodo comprehendentes notas, quæ ad speciem ab aliis omnibus antea cognitis distinguendam conducunt; quum vero numquam adeo sint sufficientes, ut per illas ab incognitis &

& in posterum detegendis discerni possit species quæcumque, inde patet, quod perpetuis subjectæ sint mutationibus, quotiescumque nova ejusdem Generis planta detecta fuerit.

1. LAVANDULA *Spica* foliis sessilibus lanceolato-linearibus margine revolutis, spica interrupta nuda.
2. LAVANDULA *Stoechas*, foliis sessilibus linearibus margine revolutis, spica coarctata comosa.
3. LAVANDULA *dentata*, foliis sessilibus linearibus pectinato-pinnatis, spica coarctata comosa.
4. LAVANDULA *pinnata*, foliis petiolatis pinnatis; foliolis cuneiformibus, spica imbricata.
5. LAVANDULA *multifida*, foliis petiolatis pinnatis; foliolis decursive-pinnatifidis: spica quadrangulati: angulis spiralibus.
6. LAVANDULA *carnosa* foliis petiolatis ovato-cordatis ferratis carnosiss, spica tetragona, calycibus recurvatis.

DESCRIPTIONES SPECIERUM.

Lavandula *Spica*.

CAULIS tetragonus, acutangulus, tomentosus.

FOLIA lanceolato-linearia, obtusa, margine revoluta, incana, superiora sessilia, inferiora petiolata.

SPICA longe-pedunculata, verticillata, interrupta; verticillis 6-vel 10-floris, inferioribus remotioribus. *Bractæ* lato-ovatæ, aristatæ, acuminatæ, venosæ. *Flores* erecti, breve-pedicellati.

CALYX. *Perianth.* cylindricum, sulcatum, cæruleescens.

Limbus 5-dentatus, bilabiatus: dentibus tribus super.

B

terioribus, quorum intermedius maximus, subrotundus, erectus. Inferiores duo lateralibus majores. **COROLLA** resupinata, violacea, calyce paulo longior, erecta. *Labium superius* majus, lobis crenulatis; *inferius* brevius, lobo intermedio majore. **STAMIN.** *Filamenta* omnia intra tubum corollae. *Antherae* violaceae, peltatae, quadrilobae, ciliatae. **SEMINA** oblongo-ovata, nigra.

Observ. Tota planta tecta tomento ex pilis: ramulis furcatis.

Lavandula *Stoechas*.

CAULIS obtuse-tetragonus; ramuli acute tetragonii. **FOLIA** sessilia, linearia, integerrima, supra sulco longitudinali exarata, margine revoluta, subtus transversim venosa, rugosa, rachide elevata, approximata, cana.

SPICA breve-pedunculata, tetragona. *Braectae* lato-ovatae, subtrilobae: lobo intermedio productione; subtomentosae, purpureae, venosae; in summitate spicae steriles dilatantur in folia oblonga, majora, violacea, *Comam* spicae constituentia. *Flores* initio florescentiae in verticillo quaterni; sed tandem augentur gemmis lateralibus, unde spica sensim teres evadit.

CALYX. *Perianth.* cylindricum, bilabiatum: *Labio* superiore ovato, inferiore subquadrifido.

COROLLA resupinata, purpurea. *Tubus* vix calyce longior.

FRUCTUS SPICA teretiuscula, braectis flosculis paucioribus. La

Lavandula *dentata*.

CAULIS tetragonus, angulis prominentibus rotundatis utrimque sulco exaratis, hispidus.

FOLIA sessilia, linearia, pectinato-pinnata: *foliolis* linearibus brevibus truncatis; hispida: pilis punctis eminentibus insertis.

SPICA longius-pedunculata, pedunculo tetragono tomentoso. *Bractea* lato-ovatæ, apice rotundatæ, hispida, coloratæ, venosæ; terminales majores, saturatius coloratæ. In ceteris cum *L. Stoecha* de convenit.

Lavandula *pinnata*. Tab. I.

CAULIS ramosissimus.

FOLIA pinnata: *foliolis* cuneiformibus, emarginatis; impari sæpius præmorso. *Petioles* canaliculati, inferiores longissimi.

SPICA tetragona, lanceolata, acuta. *Bractea* lanceolata, holosericea, quaternæ.

CALYX. *Perianth*: quadridentatum, incanum.

COROLLA resupinata, purpurea. *Tubus* erectus, calyce duplo longior.

STAMIN. *Filamenta* omnia intra tubum corollæ. *Anthera* rotunda.

Lavandula *multifida*.

CAULIS tetragonus, angulis acutis, villosissimis.

FOLIA pinnata: *foliolis* decursive pinnatifidis: *lacinis* 4 ad 5, (quarum tres marginis superioris & solitaria inferioris,) lanceolatis, obtusis; folia infe-

feriora petiolata, superiora sessilia; omnia plana, pilosa; suprema pilis duplicis figuræ vestita: simplicibus paucioribus, compositis copiosioribus, semper madidis & subglutinosi a transpirante graveolente oleo.

SPICA longe-pedunculata: pedunculo tomentoso; tetragona, lanceolata. Sub florescentia sensim elongatur & tandem cylindrica evadit, angulis 4, sed spiralibus; hinc singularis *Spica fructus*. *Bractææ* lanceolatae, tomento-canæ, breviores. *Flores* in verticillo quaterni.

CALYX. *Perianth*: ovatum, versus faucem sensim coarctatum. *Labium superius* rectum, truncatum, denticulis tribus valde obsoletis: *inferius* bidentatum, denticulis acutis, erectis, tubo corollæ adpressis.

COROLLA resupinata, violacea.

FRUCTUS SPICA quadrangularis, spiralis, bracteis & calycibus emarcidis, dentibus calycinis hiantibus.

Lavandula *carnosa*. Tab. II. fig. 1.

CAULIS tetragonus: angulis rotundatis, vix pubescens.

FOLIA ovato-cordata, carnosa, serrata, venosa, subtilissime pubescentia, tempore florescentiæ decidua, petiolata; petiolis longitudine foliorum, horizontalibus, semiteretibus, canaliculatis.

SPICA primo pyramidata, tetragona; sub florescentia dilatatur & evadit teres: foecundatis vero Germinibus in cylindrum elongatur. *Bractææ* carnosæ, pilosæ, ciliatæ, acutæ, erectæ. *Flores* in verticillo quaterni, recurvi.

CA-

CALYX. *Per:* apice recurvum, bilabiatum: *Labium superius* indivisum, ovatum, scariosum, venosum, rachide elevata, acutum, incurvatum, tubum corollæ deprimens & faucem labiumque inferius Calycis perfecta florescentia arcte obtegens. *Labium inferius* indivisum, brevissimum, rotundatum, lunare, reflexum. *Faux* calycis coarctata, cum gibbositate utrimque prominente, villosa.

COROLLA cærulea. *Tubus* filiformis calyce multo longior, primo rectus, postea refractus, sensim versus faucem amplius, compressus. *Limbo* ringente: *Labio superiore* bifido utrimque reflexo, rotundato; *Fauce* lineari, perpendiculari. *Labium inferius*, quasi *operculum* faucis expanso flore dependet horizontaliter, concavum, oblongum, basi attenuatum, integerrimum.

STAMIN. *Filamenta* lateri inferiori faucis inserta, labio inferiori incumbentia & apicem versus ascendentia, labio vix breviora. *Antheræ* rotundæ.

PISTILLUM ut in reliquis.

FRUCTUS SPICA refert *Strobilum* cylindricum, squamis recurvatis. Tab. II. fig. 2.

Observ. Planta difficiliter conjungitur cum reliquis hujus Generis, quas optime determinavit figura Corollæ; hanc tamen conjunctionem suadent calyx bilabiatum & genitalia resupinata, quibus ab omnibus sui ordinis Generibus probe distinguitur.

VARIETATES

oriuntur a cultura plures, quarum non nisi ma-

xime singulares nominare statui, omittens eas, quæ diversitate colorum unice differunt.

Lavandulæ *Spica* 3 existunt varietates.

- α) *angustifolia* foliis linearibus. In Hortis vulgaris, calyces producit copiosiores, fragrantiores.
- β) *latifolia* foliis latioribus ovalibus, floribus calycibusque minoribus. Hæc lætius crescit, annua.
- γ) *tomentos*i foliis plerumque albidis. Enascitur e seminibus ab Hispania allatis, ramulis lateralibus propaganda.

Lavandula *multifida* duas comprehendit varietates.

- α) *monostachya* cana, spica simplici, caule villosa, foliis brevioribus, obtusioribus mollibus.
- β) *polytachya* fruticosa, glabra, spica polydactyla, caule glaberrimo, foliis majoribus acutioribus glabris. *Planta* annua, magnitudine priorem superat.

Lavandula *Stoechas* triplici modo variat.

- α) *purpurea* foliis latioribus, spicis sessilibus angulatis apice purpureo-comosis.
- β) *pedunculata* foliis angustioribus, spicis elongato-pedunculatis rotundatis apice viride comosis.
- γ) *aphylla* cauliculis non foliosis. C. B.

SYNONYMA.

Omnia ea recensere synonyma, quibus ab Autoribus descriptum est hoc Genus, inutile foret, quapropter non nisi pauca & usitatissima ejus nomina adferenda existimaverim.

La.

1. *Lavandula spica* foliis lanceolatis integerrimis, spicis nudis, Sp. plant. pag. 800.

Lavandula C. B. Pin. p. 216, ubi omnia ante hujus Auctoris tempus enumerantur Synonyma.

Lavandula angustifolia, Garid. plantes d' Aix t. 60.

Lavandula BLACKVELL, tab. 294.

La Lavende femelle REGNAULT Botanique, mise à la portée &c. Fig. optima.

2. *Lavandula Stoechas* foliis lanceolato-linearibus, spica comosa, Sp. plant. p. 800,

Stoechas purpurea, C. BAUH. pin. p. 216.

Distamine de Crete, REGNAULT Botan. fig. pulcra

3. *Lavandula multifida*, foliis duplicato-pinnatifidis, Sp. plant. p. 800.

Lavandula folio dissecto, C. B. Pin. p. 216.

Lavandula folio dissecto, BARR. Icon. 798.

Lavandula folio longiore elegantius & tenuius dissecto, Comm. rar. 27, t. 27.

Lavandula Canariensis maritima, spica multiplici cærulea, PLUK. alm. 209; t. 203, f. 5.

4. *Lavandula dentata* foliis pinnato-dentatis, Sp. plant. pag. 800.

Stoechas folio serrato, C. B. Pin. p. 219.

Stoechas folio serrato, BARR. Icon. 797.

5. 6. *Lavandula Pinnata & Carnosa* a nemine, quantum novimus, nec depictæ sunt, nec nominatæ.

LOCUS.

Lavandula Spica sponte crescit per totam Euro-

ropam Australem usque in Helvetiam, nec non in Africa Algierenfi & Oriente passim.

Lavandula Stoechas Europam quoque australem agnoscit patriam & in Gallia crescere desinit.

Lavandula dentata non nisi in Hispania & Oriente reperta est.

Lavandula multifida regionis Baticæ in Hispania indigena.

Lavandulæ pinnatæ solum natale nondum innotuit; sed unicum, quod videre licuit specimen, liberalitati debeo D:ni Doct. C. P. THUNBERG, qui pro solito suo in me favore, plantam hanc, in Anglia acceptam, mecum communicare voluit.

Lavandula carnosæ habitat ad Sadraffam Indiæ Orientalis, ubi in siccissimis crescit rupibus & muris, tempore calidissimo florens; quando eam adeo vexavit æstus, ut folia mittere coacta sit. D. D. KÖNIG.

CULTURA.

Qui genuinam plantarum culturam cognoscere studet, is solum earum natale sibi perspectum reddere debet; deficiente autem hac notitiâ, e re est, ut a proprietatibus aliarum, quæ cognationem cum illa habent, quid faciendum sit, judicet; hoc etiam raro fallit, quando ad Ordines rite formatos pertineat planta.

Verticillatæ omnes Ringentes, suffruticulosæ & Spirantes, textura gaudentes fibrosa & densiore, minorem succi nutrientis copiam ad sustentationem requirunt eamque ob causam in solo arido & duro potis-

potissimum crescunt. Quum rigidiores sint, coelum amant apertum, ut ventis semper pateant. Majorem denique solis calorem, quam aliæ complures plantæ, ~~postulant~~, cujus sufficiens satis exemplum præbent colles Hispaniæ, ubi omnia fere vegetabiliaestate consumit ingens & intolerabilis calor; verticillatæ autem suffruticosæ pleræque hoc præsertim tempore pulchre virent vigentque. Itaque Lavandula, utpote hujus Ordinis planta, sicciorē & sabulosam in primis adamat terram, aërem nudum, locumque apricum; sæpius tamen accidit, ut spongiosiori etiam adsuescere possit solo, unde lætius crescit & folia profert majora; sed nec tanta calycum copia, nec odore adeo fragrante abundat, quam planta Hispanica, antequam consenuerit frutex.

Multiplicatur autem & propagatur Lavandula non solum ramulis, ut verticillatæ omnes suffruticosæ, sed etiam adnatis junioribus plantulis, quæ verno tempore avelluntur & humo apta tectæ per dies aliquot irrigantur, donec radices protrudere coeperint. Hæc propagandi methodus in primis necessaria est, quando varietatem quamdam fariorem servare & individua augere volumus. De cetero observandum, quod melius vigeat planta, si vetustiores caules tertio quovis anno de novo transplantatæ, sibi convenienti humo imponantur.

Lavandula *carnosa* inter congeneres non tantum solum poscit aridissimum, sed calorem etiam ingentem. Eodem modo ac *succulentæ* omnes, ramulis propagatur, qui tamen, postquam abscissi fuerant,

C

mo-

modice ficcari debent, donec curatum fuerit vulnus, quo facto macilentæ committantur humo, ut radices agere possint.

Cultura minus idonea Lavandulæ, ut & aliis nocet plantis. Si fertilior fuerit terra & inde citius, quam par esset, adoleverit herba, Flores quidem mature producit & magnitudo foliorum mirum in modum augetur; sed jam vix nisi unico durat anno, nec matura perficere valet semina.

Lavandulæ, ut omnibus hujus ordinis, damnum adfert humiditas nimia, quæ intra lignum & corticem hæret, unde separatur a frutice cortex & planta ipsa nigrescit..

Ab aëre stagnante motuque privato debilitantur ramuli, palleſcunt & pereunt.

Lavandulæ omnes, *Carnosa* excepta, sempervirentes sunt & folia earum per ipsam hiemem, in Europa Australi eis minime noxiam, sub dio persistunt. Gelidas Upsaliæ nostræ hiemes adeo pulchre sustinet Lavandula *Spica*, ut ramis, vel alio quocumque modo eam tegere, vix opus sit; si autem locum habeat humidiores, periculum est, ne vehementia frigoris lædere possit.

QUALITATES.

Et *olidum* & *sapidum* in hoc Genere facile percipi possunt.

OLIDUM spirat Lavandula sensibus nostris amicum, fragrans, suave & reficiens; sensus autem, quem excitat odor, verbis difficiliter exprimitur.

SA-

SAPOREM constituit amarities cum calore conjuncta, quem tamen levior sensus frigoris tollit (ut in *Mentha Piperita*). Eo quoque tempore, quo manditur herba, observatur fragrantia olidi, unde ipsum sapidum aromatis nomine adornaverint nonnulli *Materiae Medicæ Scriptores*. De cetero sapor herbæ idem fere est, ac in supra memorata *Mentha*; sed ~~in~~ *quali* ejus calefaciens & refrigerans debilior.

In *L. angustifolia* fragrantia foliorum minor, quapropter *L. latifolia* illi anteferenda.

L. Stoechas fortiorem quidem & odorem & saporem, quam *L. Spica*, habere videtur; sed ut minus grata locum priori dudum cessit in officinis.

L. multifida non tantum odore omnium fortissimo & bituminoso, sed etiam amaritie gaudet majori.

L. dentata cum *Stoechade* in plurimis convenire videtur.

L. pinnatæ nonidum innotuerunt qualitates; forte ejusdem indolis, ac *L. multifida*.

L. carnosæ odore caret, ut plantæ omnes succulentæ, quarum insensibilis fere est transpiratio; sentiri autem potest sapor amarus, ablata in primis materia aquosa, quæ initio qualitates ejus amaras quasi involvit.

Olidum Lavandulæ in plantis spontaneis potissimum quærendum, quum cultæ magnam hujus proprietatis partem amiserint; præcipue vero cavendum a plantis apricis, solo uliginoso crescentibus, quæ & saporem & odorem habent magis ingratum.

Qualitates Lavandulæ in summitatibus herbæ præsertim conspiciuntur; sunt enim oleo perpetuo exsudante madidæ.

Fragrantia majori gaudent ante florentiam calyces; hac vero peracta & maturis fere seminibus, pars major olidi evanescit; unde constat, quod colligi debeant hujus Ordinis herbæ, vel ante florentiam, vel eo ipso, quo florere incipiant, momento. Si gravior fuerit æstus, tempore matutino legantur plantæ, in usum medicum destinatæ, vel potius fiat collectio, postquam plurium dierum antecesserunt pluviz; quum enim eas diutius vexarunt radii solares, adeo exsudat olidum, ut ingruente nocte vix quidquam superfit. Nonne major minorve quantitas Olei Essentialis, quod destillando obtinetur, magnam partem a diverso collectionis tempore dependet?

Observandum præterea putavimus, quod omnes herbæ verticillatæ in Officinis accurate tegi debeant & in vasis vitreis, probe obturatis, servari, ne evanescat olidum volatile.

VIRES.

Ad vires Lavandulæ facillime concludi potest a qualitatibus & iis, quæ Ordini communes sunt, proprietatibus; nec quidquam singulare hac in re de herba nostra novimus, nisi quod gratissima sit Organicarum omnium hujus ordinis & Resolvens constituat fragrantissimum.

U-

USUS.

I. U: MEDICUS. Singulos enumerare casus, quibus utilitatem præstare posset Lavandula, nec ere esse arbitror, nec angusti permittunt Dissertationis limites. Paucis nominasse sufficiat, usurpâri nostro tempore *Flores* (l. rectius calyces *L. Angustifoliae*) vix interne, sed solummodo externe, ut resolvens, in facculis: *Spiritus* Lavandulæ externe in Paralyâ linguæ, animi deliquiis & quando excitandæ sint vires vitales, commendatur. *Oleum* Lavandulæ vel *Spicæ* plerumque relictum est a Medicis, quum vix obtineri possit sincerum.

II. U: DOMESTICUS. In Hortis plantatur Lavandula ad ornamenta arearum, ubi ob flores pulcherrimos & odorem suavissimum, Buxo palmam præripit.

Verticillatæ, in primis Ringentes, tubam corollæ magnam partem succo melleo habent completum, unde incipiente florentia a Lepidopteris, Hymenopteris & Dipteris, ut mel extrahant advolantibus, sedulo visitentur; hinc planta Apibus gratissima & frequentius hanc ob causam colenda, præcipue quum mel reddat odore Lavandulæ fragrantissimum.

Oves Hispaniæ pascetes in collibus, quibus copiosissime crescit Lavandula, carne gaudent sapore præstantissima.

Var. *Latifolia* in condimenta farciminum & lavacra adhibetur. *Calyces* cum corollis Rosarum Species constituunt aromaticas, *Pot pourri* dictas. *Foliis* Lavandulæ ocy-

Ocymo mixtis & in pulverem redactis utuntur Mulieres Arabicæ ad conspergendos crines, non tantum ob odorem gratissimum, sed etiam ut firmentur & fortius crescant capilli. Pulvere eodem malas fricare solent, ut excitetur rubor & tonus fribrarum cutis augeatur *), quem etiam in finem *Acetum Lavandulæ* in Gallia adhibet sequior sexus **). *Oleum* essentiale Pomata quælibet suaveolentia reddit. *Spiritus* (vulgo eau de Lavende) adeo frequentis & varii est usus, ut longum foret omnes & singulos enumerare; Itaque
manus de tabula.

*) FORSSKÅL in litteris. **) Laboratoire de Flore, p. 368.

